

歷朝

部說種五十三百一

觀大

古今說海

明雲間陸氏原編

集成圖書公司印行

集丑



編二第選說



上海图书馆藏书




A541 212 0017 01208

明
雲
閩
陸
氏
原
編

說
選

集
成
圖
書
公
司
印



宣統元年季冬月
第二次印於上海

古今說海

遼志

說選十偏記七

本末

契丹之始也中國簡冊有所不載遠夷草昧復無書可考其年代不可得而詳也本其風物地有二水曰地乜里沒里復名陶猥思沒里者是其一也其源出自中京西馬孟山東北流華言所謂土河是也曰婁羅個沒里復名女古沒里者又其一也源出饒州西南平地松林直東流華言所謂潢河是也至木葉山合流爲一古昔相傳有男子乘白馬浮土河而下復有一婦人乘小車駕灰色之牛浮潢河而下遇於木葉山顧合流之水與爲夫婦此其始祖也是生八子各居分地號八部一曰祖皆利部二曰乙室語部三曰實活部四曰納尾部五曰顛沒部六曰內會雞部七曰某解部八曰奚嗚部立遺像於木葉山後人祭之必刑白馬殺灰牛用其始來之物也後有一主號曰迺呵此主特一鬪髀在穹廬中覆之以氈人不得見國有大事則殺白馬灰牛以祭始變人形出視事已卽入穹廬復爲鬪髀因國人竊視之失其所在

復有一主號曰嗚呵戴野猪頭披野猪皮居穹廬中有事則出退復隱入穹廬如故後因其妻竊其猪皮遂失其夫莫知所如次復又一主畫里昏呵惟養羊二十口日食十九留其一焉次日復有二十口如之是三主者皆有能治國之名餘無足稱焉異矣哉氈中枯骨化形治事戴猪首服豕皮罔測所終當其隱入穹廬之時不知其孰爲之主也孰爲之副貳也荒唐怪誕訛以傳訛遂爲口實其詳亦不可得而詰也自時厥後牛馬死損詞訟龐淹復遭風雨雪霜之害中遂衰微八部大人後復稍整兵三年一會於各部內選雄勇有謀略者立之爲主舊主退位例以爲常至阿保機爲衆所立後併七部而滅之契丹始立其國大原興自阿保機至耶律德光而浸盛遭五季之衰天未厭亂石晉胎釁產禍諸華毒痛四海飛揚跋扈貪殘僭擬中國帝王名數盡盜有之冠履倒植薰蕕共染干戈之慘極矣迨宋眞宗屈已和戎不復以一矢相加含容覆護百有餘年聖興道三主以來天誘其衷革心慕義貪婪歲幣顧惜盟好銷鋒寢柝號稱無事南北皆不知兵各保首領以沒茲非以德懷遠之明效與祖宗列聖之德可謂至哉若遼之威服諸夷奄有全燕何其強也天祚昏孱女眞

啓心深入一呼土崩瓦裂何其弱也且兵者不祥之器也天道好還盛極而微理固然也故其興也勃焉其亡也忽焉悲夫今據舊聞哀其本末雖未能考其異而訂其同要之大略其不相遠後之英主忠臣志欲溯今洞古可以爲鑒矣

族姓原始

契丹都部族本無姓氏惟各以所居地名呼之婚嫁不拘地里至阿保機變家爲國之後始以王族號爲橫帳仍以所居之地名曰世里著姓世里者上京東二百里地名也復賜后族姓曰蕭氏番法王族惟與后族通婚更不限以尊卑其王族后族二部落之家若不奉北主之命皆不得與諸部族之人通婚或諸部族私相婚嫁不拘此限故北番惟耶律蕭氏二姓也

國土風俗

契丹國在庫莫奚東唐所謂黑水靺鞨者今其地也有七十二部落不相統制好爲寇盜父母死而悲哭者以爲不旺但以其屍置於山樹上經三年後方取其骨而焚之因酌酒而祝曰冬月時面陽食我若射獵時使我多得豕鹿其無禮頑囂於諸夷

最甚其風俗與奚靺鞨頗同至阿保機稍并服諸小國而多用漢人漢人又教之以隸書半增損之作文字數千以代刻本之約又制婚嫁置官號稱皇帝

部落

漢時爲匈奴所破保鮮卑山魏靑龍中部酋爲王雄所殺衆遂逃橫水之南黃龍之北至元魏自號曰契丹在唐開元天寶間使朝獻者無慮二十故事以范陽節度爲押奚契丹使至唐末契丹始盛

併今部落

初契丹有八部族之大者曰大賀氏後分爲八部部之長號大人而常推一人爲王建旗鼓以統八部每三年則以次相代或其部有災疾而畜養衰耗則八部聚議以旗鼓立其次而代之被代者以爲元約如此不敢爭及阿保機乃曰中國之王無代主者由是阿保機益以威制諸國不肯代其立九年諸部共責詣之阿保機不得已傳其旗鼓而謂諸部曰吾立九年所得漢人多矣吾乃別自立一部以爲漢城可乎諸部許之漢城在炭山東灤河上有鹽鐵之利乃後魏滑鹽縣是也其地可植五穀

阿保機率漢人耕種爲治城郭邑屋廛市如幽州制漢人安之不復思歸阿保機知衆可用用其妻述律策使人告諸部大人曰我有鹽鐵之利諸部所食然諸部知食鹽之利而不知其鹽有主人可乎當來犒我諸部以爲然共以牛酒會鹽池阿保機伏兵其旁俟其酒酣伏兵發盡殺諸部大人復併爲一國東北諸夷皆畏服之

兵馬制度

晉末契丹主部下兵謂之大帳有皮室兵約三萬騎人皆精甲兵也爲其爪牙國母述律氏部下謂之屬棚有衆二萬是先戎主阿保機牙將半已老矣每南來時量分借五千騎述律氏常留數百兵爲部落根本其諸大酋領太子偉王永康南北王子趙麻答五押等大者千餘騎次者數百人皆私甲也別族則有奚霫勝兵亦千餘人少馬多又渤海酋領大舍利高模漢兵步騎萬餘人並髡髮左衽竊爲契丹之節復有近界韃靼於厥里室韋女真黨項亦被脅屬每部不過千餘騎其三部落吐渾以隄陌幽州管內鴈門以北千餘軍州部落兵合三五萬餘衆此是石晉割賂契丹之地番漢諸族其數可見矣每契丹南侵其衆不啻十萬國主入界之時步騎車帳

不從阡陌東行一槩而行大帳前及東西面差大首領三人各率萬騎支散游變百十里內外相覘邏謂之欄子馬戎主吹角爲號衆則頓舍環遶穹廬以近及遠折木稍屈之爲弓子輔不設槍營塹柵之備每行軍聽鼓三伐不問昏晝一布便來行逢大敵不乘戰馬俟近敵師卽競乘之所以新羈戰馬蹄有餘力其用軍之術成列而不戰俟退而乘之多伏兵斷糧道隨冒夜舉火上風曳柴積餉自齎退敗無耻散而復聚寒而益堅此其所長也

建官制度

賤他姓貴耶律蕭氏二姓其官有契丹樞密院及行官都總管司謂之北面以其在牙帳之北以主番事又有漢人樞密院中書省行官都總管司謂之南面以其在牙帳之南以主漢事其陽隱宗正寺也夷離畢參知政事也林牙翰林學士也夷離中刺史也內外官多倣中國者其下佐吏則有敝史木古思奴古都奴古徒奴古分領兵馬則有統軍侍衛控鶴司南王北王奚王府王帳分提失哥東西都省太師兵又有國舅軫轄騰遙輦裳袞諸司南北皮室二十部族節度頻必里九克漢人渤海女

眞五節制五治火帥一百六百九百家矣凡民年十五以上五十以下皆籍爲兵時舉兵必殺灰牛白馬祠天地及木葉山神鑄金魚符調發兵馬其從馬及傳命有銀牌二百軍所舍有遠探欄子馬以夜聽人馬之聲每其立衆所得人戶馬牛金帛及其下所獻牲口或犯罪沒入者別爲行官領之建州縣置官屬旣死則設大穹廬鑄金爲像朔望節辰忌日輒致祭築臺高丈餘以盆焚食謂之燒飯

宮室制度

十宮各有門戶出兵馬阿保機曰洪義宮德光曰永興宮兀欲曰積慶宮述律曰延昌宮明記曰章敏宮突欲曰長寧宮燕燕曰崇德宮隆緒曰興聖宮隆慶曰敦睦宮隆運曰文忠宮王府又有四樓在上京者曰西樓木葉山曰南樓謂化州曰東樓唐州曰北樓凡受冊積柴升其上大會番夷其下已乃燔柴告天而漢人不得預有譚子部百人夜以五十人番直四鼓將盡歌於帳前號曰聒帳每謁木葉山卽射柳枝譚子唱番歌前導彈胡琴和之已事而罷

衣服制度

國母與番官胡服國主與漢官卽漢服番官戴氍冠上以金華爲飾或以珠玉翠毛蓋漢魏時遼人步搖冠之遺像也額後重金花織成夾帶中貯髮一總服紫窄冠帶以黃紅色條裏革爲之用金玉水晶碧石綴飾又有冠如紗帽無簷不撤雙馬額前綴金花上結紫帶末綴朱或紫卓幅巾紫窄袍束帶丈夫或綠中單綠花窄袍中單多紅綠色貴者被貂裘以紫黑色爲貴青色爲次又有銀鼠尤潔白賤者被貂毛羊鼠沙狐裘弓以皮爲弦箭削楝爲幹韉勒輕快便於馳走以貂鼠或鵝頂鴨頭爲捍腰宋眞宗景德中太常博士王曙戶部員外郎李維往賀國主生辰還言國主見漢使彊服衣冠纔已卽帳中雜番騎出郊射獵矣

漁獵時候

每歲正月上旬出行射獵凡六十日然後並撻魯河鑿冰釣魚水畔卽縱鷹鷂以捕鵝鴈夏居炭山或上京避暑七月上旬復入射鹿夜半令獵人吹角做鹿鳴鹿旣集而射之宋眞宗時遣使往賀生辰還言始至長泊泊多野鵝鴨國主射獵領帳下騎擊扁鼓遶泊驚鵝鴨飛起乃縱海東青擊之或親射焉國主皆佩金玉錐號殺鵝宰

鴨錐初獲卽拔毛挿之以鼓爲坐遂縱飲酒醉以此爲樂又好以銅及石爲槌以擊兔每秋則衣氈裘呼鹿射之夏月以布爲氈帳籍毯圍碁雙陸或深澗洗鷹

試士科制

太祖龍興朔漠之區倥傯干戈未有科目數世後承平日久始有開闢制限以三歲有鄉村省三試之設鄉中曰鄉薦府中曰府解省中曰及第時有秀才未願赴者州縣必報刷遺之程文分兩科曰詩賦曰經義魁各名分焉三歲一試進士貢院以二寸紙書及第者姓名給之號喜帖明日舉按而出作樂及門擊鼓十二面以法雷震殿試臨期取旨又將第一人特贈一官授奉直大夫翰林應制奉文字第二人第三人止授從事郎餘並授從事郎聖宗時止以詞賦法律取士詞賦爲正科法律爲雜科若夫任子之令不論文武並奏蔭亦有員數

歲時雜記

正旦

正月一日國主以糯米飯白羊髓相和爲團如拳大於逐帳內各散四十九個候五

更三點國主等各於本帳內牕中擲米團在帳外如得雙數當夜動番樂飲宴如得隻數更不作樂便令師巫十二人外邊遶帳撼鈴執箭唱叫於帳內諸火爐內爆鹽并燒地拍鼠謂之驚鬼崇帳人第七日方出乃解禳之法北呼此謂之嫻担離漢人譯云嫻是丁担離是日

立春

立春日婦人進新春書以黃繒爲幟刻龍像銜之或爲蝦蟆

人日

人日京都人食煎餅於庭中俗云薰天未知何所從出也

中和

二月一日大族姓蕭者並請耶律姓者於本家筵席此節爲瞎里叻漢人譯云瞎里是請叻是時

上巳

三月三日國人以木雕爲兔分兩朋走馬射之先中者勝其負朋下馬跪奉勝朋人

酒勝朋於馬上接盃飲之北呼此節爲淘裏化漢人譯云淘裏是兔化是射

佛誕日

四月八日京府及諸州縣各用木雕悉達太子一尊城上昇行放僧尼道士庶民行城一日爲樂

端午

五月五日午時採艾葉與綿相和絮衣七事國主著之番漢臣僚各賜艾衣三事國主及臣僚飲宴渤海廚子進艾饊各點大黃湯下北呼此時爲討賽離又以雜絲或綠結合歡索纏於臂膊婦人進長命縷宛轉皆爲人象帶之

朝節

夏至日婦人進扇及脂粉囊謂之朝節

三伏

六月十八日大族耶律姓並請蕭姓者亦名瞎里阿

中元

七月十三日夜國主離行宮向西三十里卓帳先於彼處造酒食至十四日一應隨從諸軍並隨部落動番樂設宴至暮國主卻歸行宮謂之迎節十五日動漢樂大宴十六日早卻往西方令隨行軍兵人大噉三聲謂之迎節此節謂賽離拾漢人譯云賽離是月拾是好是月好也

中秋

八月八日國主殺白犬於寢帳前七步埋其頭露其嘴後七日移寢帳於埋狗頭上北呼此節爲担褐爛漢人譯云担褐是狗爛是頭

重九

九月九日國主打團斗射虎少者輸重九一筵席射罷於地高處卓帳與番漢臣登高飲菊花酒出兔肝切以生鹿舌拌食之北呼此節爲必里遲離漢人譯之云九月九日也又以茱萸研酒灑門戶間辟惡亦有入鹽少許而飲之者又云男摘二九粒女摘一九粒以酒嚙者大能辟惡也

小春

十月內五京進紙造小衣甲并鎗刀器械各一萬副十五日一時進塚國王與押番臣密望木葉山奠酒拜用番字書狀一紙同焚燒奏木葉山神云寄庫北呼此時爲戴辨漢人譯云戴是燒辨是甲

冬至

冬至日國人殺白馬白羊白鴈各取其生血和酒國主北望拜黑山奠祭山神言契丹死魂爲黑山神所管又彼人傳云凡死人悉屬此山神所管富民亦然契丹黑山如中國之岱嶽云北人死魂皆歸此山每歲五京進人馬紙甲各萬餘事祭山而焚之其禮甚嚴非祭不敢近山

臘月

臘月國主帶月戎裝應番漢臣諸司使已上並戎裝五更三點坐朝動樂飲酒罷各等第賜御甲羊馬北呼此節爲抄離耐漢人譯云抄離是戰耐是時是戰時也

詔盜

五月十三日放國人作賊三日如盜及十貫以上依法行遣北呼爲鶻里耐漢人譯

云鶻里是偷阿是時也

行軍

契丹行軍不擇日用艾和馬糞於白羊琵琶骨上灸灸破便出行不破卽不出

午日

契丹出軍每遇午日起程如不用兵亦須望西大喊三聲行之彼言午是北朝大王之日

旋風

契丹人見旋風合眼用鞭望空打四十九下口中道坤不刻七聲

舍利

契丹國內富豪民要裹頭巾者納牛駝十頭馬百疋并給契丹名目謂之舍利

跪拜

凡男女拜皆同其一足跪一足著地以手動爲節數止於三四彼言捏骨地者卽跪也

長白山

長白山在冷山東南千餘里蓋白衣觀音所居其山內禽獸皆白人不敢入恐穢其間以致蛇虺之害黑水發源於此舊云粟末河太宗破晉改爲混同江其俗剝木爲舟長可八尺形如梭子曰梭船上施一槳止以捕魚至渡車則方舟或三舟

澤蒲

西樓有蒲瀕水叢生一葉如柳長不盈尋丈用以作箭不矯作而堅左氏所謂董澤之蒲是也


回鶻豆

回鶻豆高二尺許直榦有葉無旁枝角長二寸每角止兩豆一根才六七角色黃味如粟

螃蟹

渤海螃蟹紅色大如碗螯巨而厚其脆如中國蟹螯巖舉鮫魚之屬皆有之

葉隆禮撰



遼志終

古今說海

金志

初興本末

說選十一 偏記八

金國本名朱里眞番語舌音訛爲女眞或曰慮眞避契丹興宗名又曰女直肅慎氏遺種渤海之別族也或曰三韓辰之役挈氏於此地中最微且賤唐貞觀中靺鞨來中國始聞女眞之名世居混同江之東長白山下其山乃鴨綠水源南鄰高麗北接室韋西界渤海鐵離東瀕海三國志所謂抱婁元魏所謂句吉唐所謂黑水靺鞨者今其地也其屬分六部有黑水部卽今女眞其水掬之則色微黑契丹曰爲混同江深二十丈餘狹處可六七十步闊者至百步居江之南者謂之熟女眞以其服屬契丹也江之北者謂之生女眞亦臣服於契丹後有酋豪受宣命爲首領號太師契丹自賓州混同江北八十里建寨以守又云契丹乘唐衰併吞諸番三古六女眞在其中契丹恐女眞爲患誘豪右數千家處之遼陽之南而著籍焉分其勢使不得與本國通謂之合蘇款自咸州東北分界入宮口主東沫江中間所居之女眞咸隸兵馬

司與其國往來無禁謂之回羈抵凌而野居者謂之黃頭女真又居束沫江之北甯州江之東地方千餘里人戶十餘萬無大君長亦無國名止是族帳散居山谷間自推豪傑爲酋長小者千戶大者數千戶蓋七十二部落之一也僻處契丹東北隅臣屬一百餘年世襲節度使兄弟相傳週而復始或又云其初酋長本新羅人號完顏氏完顏猶漢言王也女真妻之以女生二子其長卽胡來也其自此傳三人以至阿骨打以其國產金及有金水源故稱爲大金

初興風土

女真在契丹東北隅地饒裕山林田宜麻穀土產人參蜜蠟北珠生金細布松實白附子禽有鷹鷂海東青之類獸多牛馬麋鹿野狗白兔青鼠貂鼠其人勇悍好詐貪婪殘忍善騎射喜耕種好漁獵每見野獸之蹤躡而求之能得其潛藏之所又以樺皮爲角吹作呦呦之聲呼麋鹿而射之其居多依山山谷聯木爲柵或覆以板與梓皮如墻壁亦以木爲之冬極寒屋纔高數尺獨開東南一扉扉旣掩復以草綢繆塞之穿土爲床煨火其下而寢食起居其上厚毛爲衣非入室不撤衣衣屨稍薄則墮指

裂膚雖盛夏如中華初冬俗勇悍喜戰鬪耐饑渴苦辛騎上下崖壁如飛濟江河不用舟楫浮馬而渡其樂惟鼓笛其歌惟鷓鴣曲第高下長短如鷓鴣聲而已其疾病無醫藥尙巫覡病者殺猪狗以禳之或用車載病者入深山大谷以避之其親友死則以刀割額血淚交下謂之送血淚死者埋之而無棺槨貴者生焚所寵奴婢所乘鞍馬以殉之其祭祀飲食之物盡焚之謂之燒飯其道路無旅店行者息於民家主人初則拒之拒之不去方具飯食而納之其市無錢以物博易無工匠其舍屋車帳往往自能爲之其禮則拱手退身爲諾跪左膝蹲右膝拱手搖肘爲拜其節序元旦則拜日相慶重午則射柳祭天稅賦無常隨用度多寡而斂之與契丹言語不通而無文字賦斂科發射箭爲號事急者三射之多以牛驢負物遇雨則張牛革以禦之緩則射獵急則戰鬪宗室皆謂之卽君事無大小皆屬焉

男女冠服

金俗好衣白櫟髮垂肩與契丹異垂金鑲留顛後髮繫以色絲富人用珠金飾婦人辮髮盤髻亦無冠自滅遼侵宋漸有文飾婦人或裹逍遙或裹頭巾隨其所好至於

衣服尙如舊俗土產無桑蠶惟多織布貴賤以布之麤細爲別又以化外不毛之地非皮不可禦寒所以無貧富皆服之富人春夏多以紵絲錦衲爲衫裳亦間用細皮布秋冬以貂鼠青鼠狐貉或羔皮或作紵絲紬絹貧者春夏並用爲衫裳秋冬亦衣牛馬豬羊貓犬魚蛇之皮或獐鹿麋皮爲袴爲衫袴襪皆以皮至婦人衣曰大襖子不領如男子道服裳曰錦裙裙去左右各闕二尺許以鐵條爲圈裹以繡帛上以單裙襲之

婚姻

金人舊俗多指腹爲婚姻既長雖貴賤殊隔亦不可渝婿納幣皆先期拜門戚屬偕行以酒饌往少者十餘車多者至十倍飲客佳酒則以金銀器貯之其次以瓦器列於前以百數賓退則分餉焉先以烏金銀杯酌飲貧者以木酒三行進大輦脂小輦脂如中國寒具以進蜜餞人各一盤曰茶食宴罷富者淪建茗留上客數人啜之或以麤者煎乳酪婦家無大小皆坐炕上婿黨羅拜其下謂之男下女禮畢婿牽馬百匹少者十匹陳其前婦翁選子姓之別馬者視之好則留不好則退留者不過十二

三或皆不中選雖壻所乘亦以充數大抵以留馬少爲恥女家亦視其數而厚薄之一馬則報衣一襲壻皆親迎旣成壻留於婦家執僕隸役雖行酒進食皆躬親之三年然後以婦歸則婦氏用奴婢數十戶牛馬數十羣每羣九牝一牡以資遣之夫謂妻爲蔭蔭妻謂夫爲愛根一云婚家富者以牛馬爲幣貧者以女年及笄行歌於途其歌也乃自敘家世婦工容色以伸求侶之意聽者有求娶欲納之卽攜而歸後復方補其禮偕來女家以告父母父死則妻其母兄死則妻其嫂叔伯死則姪亦如之無論貴賤人有數妻

飲食

飲食甚鄙陋以豆爲漿又嗜半生米飯漬以生狗血及蒜之屬和而食之嗜酒好殺釀糜爲酒醉則縛之俟其醒不爾殺人

阜隸

阜隸出身與蔭人等甚以爲重如州郡都吏出職並補將仕郎授錄事判官司司徒司判寺丞至儒林亦蔭子部吏缺人令州縣擇人貢之十年無公私過補昭信校尉授

下縣令或錄事漸爾亦可至知州同州

浮圖

浮圖之教雖貴戚望族多舍男女爲僧尼惟禪多而律少在京曰國師師府曰僧錄僧正列郡曰都綱縣曰維那披荆威儀與南宋等所賜號曰大師曰大德並賜紫所謂國師在京之老尊宿也威儀如王者國主有時而拜服眞紅袈裟升堂問話講經與南朝等僧錄僧正師府僧職也皆擇其道行高者限三年爲一任任滿則又別擇人張官府設人從僧尼有訟者皆理而決遣之並服紫袈裟都綱則列郡僧職也亦以三年爲任有師號者賜紫無者如常僧服維那縣僧職也僧尼有訟者答以下決遣之杖以上者並申解僧錄都綱司

道教

金國崇重道教與釋教同自奄有中州之後燕南燕北皆有之所設道職於師府置司正曰道錄副曰道正擇其法籙精專者授之以三年爲任任滿則別擇其人其後熙宗又置道階凡六等有侍宸授經之類諸大貴人奉一齋施動獲千緡道教之傳

有自來矣

科條

金國之法極嚴殺人剗刳者搥其腦而致之死藉其家爲奴婢親戚欲得者以牛馬財物贖之其贓以十分爲率六歸主四沒官罪輕者決柳條罪重者贖以物貸命則割耳鼻以誌之其獄掘地數丈置囚於其中罪無輕重悉笞背州縣官各許專決當其有國之初刑法並依遼制常刑之外又有一物曰沙袋以革爲囊實以沙石繫於杖頭人有罪者持以決其背大率似脊杖之屬惟數多焉自熙宗立始加損益首除沙袋之制至皇統間又下學士院令討論條例頒行天下目之曰皇統新制近千餘條海陵熙宗立又去脊杖以其近人心故也斬刑者與上古之制一也處死者免決重杖止令紛紛絞也流者不流犯人之家屬徒者非謂杖脊代徒實拘役也徒止五年五年以上卽死罪也徒五年則決杖二百四年百八十三年百六十二年百四十年百二十杖無太小止以荆決臀實數也拘役之處逐州有之曰都作院所徒之人或使之磨甲或使之土工無所不可脚腕以鐵爲鐐鑰鎖之罪輕者用一罪重者

二之朝縱暮收年限滿日則逐便不得依舊爲百姓刑法與舊不相遠惟僧尼犯姦者強盜不論得財與不得財者並處死強姦者罪死則與古法異

赦宥

金國以赦宥最爲大事或改元或生子或册封或遷都或災異並皆肆赦罪無減等一例放之每赦必有恩內外小大文武百官並與覃遷一資熙宗臨季年一歲兩赦海陵立常謂赦宥非國家常典若惠姦宄則賊良民詔告天下自今以往更不議赦不兩年躬自蹈之其後復有改正隆赦迨世宗立纔數年間已降三赦然洪忠宣松漠記聞云北朝惜赦無郊霈余銜命十五年才見兩赦一爲舍都姑叛一爲皇子生豈是時天會年間惜赦而此後不惜赦邪

屯田

屯田之制本出上古金國行之比上古之制尤簡廢齊國後慮中州有懷王三戶之意始置屯田軍非止女真契丹亦有之自本部族徙居中土與百姓雜處計其戶口給賜官田使自播種以充口食春秋量給衣服若遇出軍之始月給錢米米不過十

斗錢不過數千老幼在家依舊耕耨亦無不足之歎今屯田去處大名府山東河北兩關諸路皆有之約一百三十餘千戶每千戶止三四百人所居止處皆不在州縣築寨處村落間千戶百戶雖設官府亦在其內

田獵

金國酷喜田獵昔會寧四時皆獵海陵遷燕以都城外皆民田三時無地可獵候冬月一出必踰月后妃親王近臣皆附焉每獵則以隨駕軍密布四圍名曰圍場待狐兔猪獐麋鹿散走於圍中國主必先射之或以鷹隼擊之次及親王近臣出圍者許諸餘人捕之飲隨處而進或以親王近臣共食遇夜或宿於州縣或宿於郊野無定海陵以其子光漢年十二獲獐取而告太廟熙宗尤甚有三事令臣下不諫曰作樂曰飯僧曰圍場其重田獵如此

兵制

金國凡用師征伐上自大元帥中自萬戶下至百戶飲酒會食略不間列與父子兄弟等所以上下情通無閉塞之患國有大事通野環坐畫灰而議自卑者始議畢卽

漫滅之不聞人聲軍將行大會而飲使人獻策主帥聽而擇焉其合者卽爲特將任其事暨師還戰勝又大會問有功者隨功高下多少支賞舉以示衆薄則增之

旗幟

金國以水德王用師行征旗皆尙黑雖五色皆具必以黑爲主尋常車出入止用一日旗與后同乘則加月旗二相間而陳或數百隊或千餘隊日旗卽以紅綃爲日刺於黃旗上月旗卽以素帛爲月刺於紅旗上近御則又有日月大繡旗二如大禮袷享册封一循古制旗無大小皆循焉然五方五星五嶽青龍白虎朱雀玄武神鳳外又有五星聯珠一日月合璧一象二天王二海馬二鷹準二太白三近御又張一大旗其制極廣錯綜神物以猛士執之傍有數十人護之各施大繩以備風勢名之曰蓋天

車繖

后妃並用殿車其車如五花樓之狀上以錦繡青氈爲蓋四圍以簾秋冬亦用氈並用金飾緣柱廊月板護泥皆飾以金玉或四輪或兩輪並朱車之四角后用金鳳妃

用金孔雀如一品二品車之四角夫人並用銀螭頭

國王織或紅或黃無定以金龍爲頂蓋后用金鳳太子用金龍妃紫織用孔雀一品青織用銀浮圖二品三品用紅浮圖四品五品青浮圖

服色

論服色各以官品如五品官便可服五品服如武臣至四品皆腰橫金若文臣則加魚不待錫賜而皆許自服焉

國主視朝服纈紗幘頭窄袖赭袍玉帶黃滿領如遇祭祀册封告廟則加袞冕法服平居閒暇阜巾雜服與士庶無別

宇文懋昭撰

金志終



古今說海

蒙鞞備錄

立國

說選十一 偏記九

鞞鞞始起地處契丹之西北族出於沙陀別種故於歷代無聞焉其種有三曰黑曰白曰生所謂白鞞鞞者顏貌稍細爲人恭謹而孝遇父母之喪則嫠其面而哭嘗與之聯轡每見貌不醜惡其腮有刀痕者問曰白鞞鞞否曰然凡掠中國子女教成却使之與人交言有情今彼部族之後其國乃鞞主成吉思之公主必姬權管國事近者入聘於我宋副使速不罕者乃白鞞鞞也每聯轡間速不罕未嘗不以好語相陪奉慰勞且曰辛苦無管待千萬勿怪所謂生鞞鞞者甚貧且拙且無能爲但知乘馬隨衆而已今成吉思皇帝及將相大臣皆黑鞞鞞也大抵鞞人身不甚長最長者不過五尺二三亦無肥厚者其面橫闊而上下有顴骨眼無上紋髮鬚絕少形狀頗醜惟今鞞主忒沒眞者其身魁偉而廣頰長鬚人物雄壯所以異也成吉思乃舊牌子頭結婁之子牌子頭者乃彼國十人之長也今爲創國之主譯曰成吉思皇帝東征

西討其國强大

韃主始起

今成吉思皇帝者甲戌生彼俗初無庚甲今考據其言而書之易於見彼齒歲也其俗每以草青爲一歲人有問其歲則曰幾草矣亦嘗問彼月日笑而答曰初不知之亦不能記其春與秋也每見月圓爲一月見草青遲遲方知是年有閏月也成吉思少被金人虜爲奴婢者十餘年方逃歸所以盡知金國事宜其人英勇果決有度量能容衆敬天地重信義所傳忒沒眞者乃小名爾初無姓氏亦無名諱近年以來有女眞叛亡之臣爲用所以譯曰成吉思皇帝或曰成吉思者乃譯語天賜兩字也

國號年號

韃國所鄰前有紂族左右乃沙陀等諸部舊有蒙古斯國在金人僞天會間亦嘗擾金虜爲患金虜嘗與之戰後乃多與金帛和之按李諒征蒙記曰蒙人常改元天興自稱太祖元明皇帝今韃人甚朴野略無制度琪常討究於彼聞蒙已殘滅久矣蓋北方之國或方千里或方百里興衰起滅無常今韃之始起並無文書凡發命令遣

使往來止是刻指以記之爲使者雖一字不敢增損彼國俗也其俗既朴則有回鶻爲鄰每於兩河博易販賣於其國迄今文書中自用於他國者皆用回鶻字如中國笛譜字也今二年以來因金國叛亡降附之臣無地容身願爲彼用始教之以文書於金國往來却用漢字去年春琪每見其所行文字猶曰大朝又稱年號曰兔兒年龍兒年自去年方改曰庚辰年今日辛巳年是也又慕蒙爲雄國故以國號曰大蒙古國亦女真亡臣教之也琪親見其權皇帝摩睺國王每自稱曰我韃靼人凡彼大臣元帥皆自稱曰我彼亦不知其爲蒙是何等名字何爲國號何爲年號今所行文書皆亡臣識字者強解事以教之耳南遷錄載韃有詔與金國稱龍虎九年非也以愚觀之更遲年歲則金虜叛亡之臣必教之撰其誕日以爲節又必教之改年立號也矣

太子諸王

成吉思皇帝兄弟凡四人成吉思居長大皇弟久已陣亡二皇弟名便古得那見在國中三皇弟名忒沒葛真所統多係自己人馬善戰有功成吉思有子甚多長子比

因破金國攻打西京雲中時陣亡今第二子却爲大太子名約直三太子名阿戴四太子名天婁五太子名龍孫皆正后所生其下又有十數人乃庶生也女七人長公主曰阿其鼈拽今嫁豹突駙馬二公主曰阿里黑百因俗曰必姬夫人曾嫁金國亡臣白四部死寡居今領白韃韃國事日逐看經有婦士數千人事之凡征伐斬殺皆自己出三公主曰阿五嫁尙書令國舅之子餘未知名孫男甚衆

諸將功臣

元勳乃彼太師國王沒黑助者小名也中國人呼曰摩睺羅彼詔誥則曰謀合理南北之音輕重所訛也見封天下兵馬大元帥行省太師國王乃黑韃韃人十年以來東征西討威震夷夏征伐大事皆決於已故曰權皇帝衣服制度全用天子禮有兄曰計里歌那自有千騎不任事弟二人長曰抹歌見在成吉思處爲護衛次日帶孫歸王每隨侍焉國王每戒所部將士如已兄弟只以小名稱之不許呼他國王止有一子名袍阿美容儀不肯剃髮焦只裹巾帽著窄服能諸國語其次曰兔花兒太傅國公聲名亞於摩睺羅又有鷓博者官亦穹見隨成吉思掌重兵又其次曰按赤那

邪見封尙書令乃成吉思正后之弟部下亦有騎軍十餘萬所統之人頗循法韃人自言隨國王者皆惡隨尙書令者皆善也其次曰劉伯林者乃燕地雲內州人先爲金人統兵頭目奔降韃主有子甚勇而韃主忒沒眞長子戰死遂將長子之妃嫁伯林之子同韃人破燕京等處甚有功伯林昨已封王近退閑於家其子見爲西京留守又其次曰大葛相公乃紀家人見留守燕京次日箭入者乃回鶻人已老亦在燕京同任事燕京等處有紙蟬兒無師史元帥劉元帥等甚衆各有軍馬皆聽摩臘國王命令

任相

首相脫合太師者乃兔花大傅之兄原女真人極狡獪兄弟皆歸韃主爲將相其次韃人宰相乃卒埒奪合又有女眞七金宰相餘者未知名率皆女眞亡臣向所傳有白儉李藻者爲相今止見一處有所題曰白倫提兵至此今亦未知存亡燕京見有移刺晉卿者契丹人登第見爲內翰掌文書又有楊彪者爲吏部尙書楊藻者爲彼北京留守琪所見國王之前有左右司二郎中使人到則二人通譯其言語乃金人

舊太守女真人也

軍政

韃人生長鞍馬間人自習戰自春徂冬旦且逐獵乃其生涯故無步卒悉是騎軍起兵數十萬略無文書自元帥至千戶百戶牌子頭傳令而行凡攻大城先擊小郡掠其人民以供驅使乃下令曰每一騎兵必欲掠十人人足備則每名需草或柴薪或土石若干晝夜迫逐緩者殺之迫逐填塞濠塹立平或供鵝洞砲座等用不惜數萬人以此攻城壁無不破者城破不問老幼妍醜貧富逆順皆誅之略不少恕凡諸臨敵不用命者雖貴必誅凡破城守有所得則以分數均之自上及下雖多寡每留一分爲成吉思皇帝獻餘物則敷俵有差宰相等在於沙漠不臨戎者亦有其數焉凡征伐謀議先定於三四月間行於諸國又於重五宴會共議今秋所向各掃其國避暑牧養至八月咸集於燕都而後啓行

馬政

韃國地豐水草宜羊馬其馬初生一二年卽於草地苦騎而教之卻養三年而後再

乘騎故教其初是以不蹄嚙也千馬爲羣寂無嘶鳴下馬不用控繫亦不走逸性甚良善日間未嘗芻秣惟至夜方始牧放之隨其草之青枯野牧之至曉搭鞍乘騎並未始與豆粟之類凡出師人有數馬日輪一騎乘之故馬不困弊

糧食

韃人地饒水草宜羊馬其爲生涯止是飲馬乳以塞饑渴凡一牝馬之乳可飽三人出入止飲馬乳或宰羊爲糧故彼國中有一馬者必有六七羊謂如有百馬者必有六七百羊羣也如出征於中國食羊盡則射兔鹿野豕爲食故屯數十萬之師不舉煙火近年以來掠中國之人爲奴婢必米食而後飽故乃掠米麥而於筭寨處亦煮粥而食彼國亦有一二處出黑黍米彼亦煮爲解粥

征伐

韃人在本國時金虜大定間燕京及契丹地有謠言云韃韜去趕得官家沒去處葛曾雍宛轉聞之驚曰必是韃人爲我國患乃下令極於窮荒出兵勦之每三歲遣兵向北勦殺謂之滅丁迄今中原人盡能記之曰二十年前山東河北誰家不買韃人

爲小奴婢皆諸軍掠來者今韃人大臣當時多有虜掠住於金國者且其國每歲朝貢則於塞外受其禮幣而遣之亦不令入境韃人逃遁沙漠怨入骨髓至僞章宗立明昌年間不令殺戮以是韃人稍稍還本國添丁長育章宗又以爲患乃築新長城在靜州之北以唐古紮人戍之酋首因唐古紮叛結卽刺都紮木典紮詳紮後典紮等俱叛金人發兵平之紮人散走投於韃人且回鶻有田姓者饒於財商販鉅萬往來於山東河北具言民物繁庶與紮同說韃人治兵入寇忒沒眞忿其欺凌以此犯邊邊州悉敗死燕虜謂韃人曰我國如海汝國如一掬沙豈能動搖韃人至今老幼皆能記此語虜君臣因其陷西京始大驚恐乃竭國中精銳以忽殺虎元帥統馬步五十萬迎擊之虜大敗又再刷山東河北等處及隨駕護衛等人馬三十萬令高琪爲大元帥再敗是以韃人迫於燕京城下是戰也罄金虜百年兵力銷折潰散殆盡其國遂衰後來凡圍河北山東燕北諸州等處虜皆不敢嬰其鋒

官制

韃人襲金虜之俗亦置領錄尙書令左右相左右平章等官亦置太師元帥等所佩

金牌第一等貴臣帶兩虎相向日虎鬪金牌用漢字曰天賜成吉思皇帝聖旨當便
宜行事其次素金牌曰天賜成吉思皇帝聖旨疾又其次乃銀牌文與前同如成吉
思亦行詔勅等書皆金虜叛臣教之遣發臨民者曰宣差逐州守臣皆曰節使今
在於左右帶弓矢執侍驍勇者曰護衛

風俗

韃人賤老而喜壯其俗無私鬪爭正月一日必拜天重午亦然此乃久住燕地襲金
人遺制飲宴爲樂也摩睺國王每征伐來歸諸夫人連日各爲主禮具酒饌飲燕在
下者亦然其俗多不洗手而拏攫魚肉手有脂膩則拭於衣袍上其衣至損不解浣
濯婦女往往以黃粉塗額亦漢舊裝傳襲迄今不改也上至成吉思下及國人皆剃
婆焦如中國小兒留三搭頭在額門者稍長則剪之在兩下者總小角垂於肩上

軍裝器械

成吉思之儀衛建大純白旗以爲識認外此並無他旌幟惟傘亦用紅黃爲之所坐
乃金裹龍頭胡床國王者間有用銀處以此爲別其鞍馬帶上亦以黃金盤龍爲飾

國王亦然今國王止建一白旗九尾中有黑月出師則張云其下必元帥方有一旗國王止有一鼓臨陣則用之鞍轡以木爲之極輕巧弓必一石以上箭用沙柳爲筈手刀甚輕薄而彎

奉使

彼奉使曰宣差自皇帝或國王處來者所過州縣及管兵頭目處悉來尊敬不問官之高卑皆分庭抗禮穿戟門坐於州郡設廳之上太守親跪以効勤宿於黃堂廳事之內鼓吹旗幟妓樂郊外送迎之凡見馬則換易并一行人從悉可換馬謂之乘鋪馬亦古乘傳之意近使臣到彼國王處凡相見禮文甚簡言辭甚直且曰你大宋好皇帝好宰相大抵其性瀟朴有太古風可恨金虜叛亡之臣教之今乃鑿混沌破彼天真教以姦計爲可惡也

祭祀

凡占卜吉凶進退殺伐每用羊骨扇以鐵椎火椎之看其兆拆以決大事類龜卜也凡飲酒先酌之其俗最敬天地每事必稱天聞雷聲則恐懼不敢行師曰天叫也

婦女

其俗出師不以貴賤多帶妻孥而行自云用以管行李衣服錢物之類其婦女專管張立氈帳收卸鞍馬輜重車馱等物事極能走馬所衣如中國道服之類凡諸酋之妻則有顧姑冠用鐵絲結成形如竹夫人長三尺許用紅青錦繡或珠金飾之其上又有杖一枝用紅青絨飾又有文袖衣如中國鶴氅寬長曳地行則兩女奴拽之男女雜坐更相酬勸不禁北使入於彼國王者相見了卽命之以酒同彼妻賴蠻公主及諸侍姬稱夫人者八人皆共坐凡諸飲宴無不同席所謂諸姬皆燦白美色四人乃金虜貴嬪之類餘四人乃韃人內四夫人者甚姝麗最有寵皆胡服胡帽而已

燕聚舞樂

國王出師亦以女樂隨行率十七八美女極慧黠多以十四絃等彈大官樂等四拍手爲節甚低其舞甚異韃人之俗主人執盤盞以勸客客飲若少留涓滴則主人者更不接盞見人飲盡乃喜如彼擊鞠止是二十來騎不多用馬者爾惡其鬪鬧也擊罷遣人來請我使人至彼乃曰今日打毬如何不來答曰不聞鈞旨相請故不敢來

國王乃曰你來我國中便是一家人凡有宴聚打毯或打圍出獵你便來同戲如何又要人來請喚因大笑而罰六盃終日必大醉而罷且每飲酒其俗鄰坐更相嘗換若以一手執盃是令我嘗一口彼方敢飲若以兩手執盃乃彼與我換盃我當盡飲彼酒却酌酒以酬之以此易醉凡見外客醉中喧闐失禮或吐或臥則大喜曰客醉則與我一心無異也我使人相辭之日國王戒伴使曰凡好城子多住幾日有好酒與喫好茶飯與喫好笛兒鼓兒吹着打着所說好城子乃好州縣也

宋孟琪撰

欽定四庫全書提要

北邊備對一卷

宋程大昌撰大昌有易原已著錄是書前有大昌自序稱溈熙二年因進講禹貢孝宗問以塞外山川未能詳對紹熙中奉祠家居乃補撰此書以緣起於講筵顧問故仍以備對爲名凡二十一則皆摭史傳舊文無所考正



古今說海

北邊備對

說選十三 偏記十

瀋熙二年臣大昌備數講官因講禹貢壽皇問曰卿言中國山川悉矣北虜地里亦能詳知之否大昌對曰虜無文史間有可傳者多弗詳實臣安敢強以不知爲知也後暨紹熙大昌乃得奉祠家居無爲常愧前此淺學無以酬塞顧問追采古來中華北狄樞紐相關者條列而推言之則虜事雖不盡知而亦可云涉獵矣初時奉訓指問者惟北狄故專主北以言不容雜舉他虜也紹熙辛亥八月新安程大昌敍

四海

四海之邊中國者在山東則爲東海在廣南則爲南海人人得而聞見不待證說矣若夫禹迹所及西境流沙而極不言西海東北嘗至碣石而北海之名不著於經則謂外薄四海訖於四海者如之何而四也漢武帝事遠有效使命方行四表故西北二海遂有身歷而目擊之者矣非道聽塗說之比也於是條支之西有海焉先漢使命固嘗見之而入諸史矣後漢班超又嘗遣甘華輩親至其地也至於西海之西又

有大秦者焉即波斯也夷人之與海商皆嘗往來若夫北海則又其甚遠者矣而霍去病之封狼居胥山也其山實臨瀚海者北海也蘇武郭吉皆爲匈奴所幽寘諸北海之上而唐史所載又曰突厥部北海之北更有所謂骨利幹之國焉在海北岸也然則詩書所稱四海者實皆環夷夏而四之非寓言矣若夫西北二虜有西海栢海青海蒲類海蒲菖海居延海白亭海鮮水海皆嘗並海立稱矣然要其實致則衆水鍾爲大澤如洞庭彭蠡之類故借海以名之非眞海也李吉甫辨白亭海而曰河北得水便名爲河塞外有水便名爲海其說確也班固敘張掖之水曰羌水出羌中東北至居延入海則眞以居延爲海矣

漢緣邊九郡

五原 鹽州朔方 夏州 雲中 雲州 代郡 鴈門 定襄 忻州 北平 平州 上谷 易州 漁陽 薊州

秦漢河南

漢史凡記三輔以及虜事而曰河南者非洛陽河之南也上郡北地隴西朔方西河皆在積石豐勝龍門三河之南故曰河南也

虜名號

北狄者太王之獯鬻宣王之玁狁幽王之犬戎桓公之山戎也爲其居四夷之北故總名北狄也至戰國遂有林胡烏桓之先也後爲鮮卑至漢初東胡遂爲冒頓所并而冒頓國於東胡之西卽漢世之匈奴也漢史之敍北狄事自秦以前皆名爲犬戎而史記李牧傳已有匈奴之名則狄人以匈奴爲國號久矣若以時世求之則蒙恬所却之胡其酋長卽頭曼也故漢史曰頭曼不勝秦而北徙頭曼者冒頓之父也頭曼之時已稱單于後又增稱撐犁孤塗單于史著其義曰撐犁者天也單于者廣大之貌也自秦至漢在北最强者惟此一族他虜雖盛莫之與京也後魏之世蠕蠕社崙始改稱單于爲可汗者其擬則皇帝也故唐高宗曰今之可汗古單于也突厥也者本匈奴之北部居金山之陽以鐵工屬蠕蠕已而益大改稱突厥突厥者兜牟也以兜牟名國明其肇迹於兵也唐初頡利大盛所據之地三垂薄海南抵大漠其地正與華夏對立而力亦相抗若夫元魏拓跋本亦北虜其勢旣盛乃竊用中國禮樂盜居中國郡縣不容列爲偏北之虜故皆不錄唐自突厥以外其疆大能與中國抗

力者薛延陀回紇沙陀吐谷渾四種最大若吐蕃雖嘗侵入北境其實西戎也

契丹

五代史曰契丹在潢水之南黃龍之北鮮卑故地或云亦鮮卑別種戰國之世命爲東胡者是也及阿保機併小族稱帝援立石晉又得其所割鴈門以北幽州節度管內十六州蓋其地東北有盧龍塞西北有居庸關中國恃此以限界北狄自十六州旣割之後山險皆爲虜有而河北盡在平地無險可以拒守矣

回紇 九姓

唐史回紇者其先匈奴也後呼鐵勒薛延陀者回紇之部落也貞觀初突厥已亡惟回紇與薛延陀爲最雄強已而回紇攻薛延陀併有其地遣使獻功太宗爲幸靈州次涇陽受其功乃以回紇部爲瀚海部督多質葛部爲燕然部督凡六部督天寶初回紇之臣裴羅襲破拔密自稱骨咄祿毗伽款可汗天子以爲奉義王居突厥故地徙牙烏德韃山南去高闕無二千里則去塞甚不遠而又盡九姓之地九姓者曰樂葛羅曰胡咄葛爲族凡九也其後裴羅又殺白眉可汗得地愈廣盡得古匈奴地肅

宗初遣兵助廣平王收長安帝以幼女妻之此在唐之中世北虜最強者也

匈奴庭

匈奴之族雖曰逐水草遷徙不常然亦擇形勢便利據一地以爲之庭猶中國之有京邑也遇戰爭游獵則隨事而出事已復歸其舊其設險據要略與中國同惟不建築城郭則大異耳

北狄無城郭

東西南三夷皆以有城郭爲固至於北夷則以不立城郭爲武韓安國曰匈奴輕疾悍亟之兵也至如颯風去如收電居處無常難得而制漢敍西域諸國有城郭國有行國城郭則其築城有守者也行國則不立城郭而以馬上爲國者也

突厥建牙

匈奴屯聚之地則曰置庭突厥兵師所駐卽曰建牙其實一也

黃河四大折

黃河自鹽澤西來暨達潼關其面勢所向凡四大折或與北狄分境或當北狄來路

其初一折由積石而逕湟中則鄯蘭也是一折也及至靈州西南遂轉北而行凡千餘里比河西岸卽爲涼肅甘沙四郡是又一折也迨其北流千里而遙至九原豐州則又轉而東流故豐州北面正柱大河是又一折也豐州之東爲榆林北境固抵大河而河從此州之東又轉而南故勝州北東兩面皆抵大河也自此而往直至潼關皆是河南矣此又一折也

長城

古來築長城以扞北虜者四世燕趙秦隋也秦制多承燕趙而隋氏不盡因秦也史記燕城起於造陽而至襄平遼陽造陽者上谷地也襄平者遼東縣也遼陽者遼水之北也皆燕國邊胡之地故其建築亦在此地也趙之城則自代地而西屬於高闕代者鴈門郡也高闕者靈州北流河之西陰山之上游也趙武靈王國於雲代故其備胡之城但能並河而西以極乎趙境耳至秦已并六國天下爲一西自上郡北地而東至遼東西悉爲秦有故蒙恬之致役也西起臨洮則中國極西之地也北屬遼東則中國極東之地也自東迄西殆萬餘里無論燕趙之與岷蘭其在當時蓋無一

地而無長城也於是會合三制而要其所宿則秦城之長固周乎中國之北矣然審而求之則其城不皆秦築也秦但補築使足耳元和志曰開皇長城自代之繁峙縣北經蔚州北十里入飛狐縣夫其自代而蔚則極北而與虜邊中國之地不出此外秦人爲城以城中夏勝地固當在此矣志又曰開皇城起嵐州合河縣經幽州皆因古跡修築夫嵐州者樓煩郡也初爲胡地後爲趙惠文所取則合河縣固可立城矣幽州者戰國時屬燕地則非趙人所得有何由可施版築也是前乎燕趙別有築之者史所不傳故槩言因古跡修築也以此知古事湮落無載者多也元和志又有大業城在靈州懷遠縣界河外則越積石河而北秦無此迹矣

大漠

漢趙信既降匈奴與之畫謀令遠度幕北以要疲漢軍故武帝必欲越漠征之而大漠之名始通中國也慕者漠也言沙磧廣莫望之漠漠然也漢以後史家變稱爲磧磧者沙磧也其義一也

玉門陽關

漢之兩關皆在燉煌郡壽昌縣通典曰漢龍勒縣也玉門在縣之北陽關在玉門之南故曰陽一陽而設兩關者自此而趨西域有南北道故也

居庸關

太行山南自河陽懷縣迤邐北出直至燕北無有間斷也此其爲山不同他地蓋數百千里自麓至脊皆陡峻不可登越獨有八處纍通微徑名之曰陁居庸關也者卽其最北之第八陁也此陁東西橫亘五十里而中間通行之地才關五步卽李左車謂井陁車不得方軌騎不得成列其險可以類推也

天山

天山卽祁連山也又名時漫羅山又名祁漫羅山蓋虜語謂爲祁連也時漫羅也祁漫羅也皆天也通典元和志於張掖縣旣著祁連山矣而伊西庭三州皆有此山則是自甘張掖而西至於庭州相去三千五百里而天山皆能周徧其地則此山亦廣長矣

陰山

漢朔方之北雲中之南代郡之西高關之東有陰山焉又有陽山焉漢書音義曰陽山在河北陰山在河南予以史漢本文考之始知陰山陽山皆在豐勝河之北謂爲河南者誤也

燕然山

後漢和帝永元元年竇憲與耿夔出朔方雞鹿塞至涿山與南匈奴兵合憲分遣精騎與戰於稽落山大破之八十一部俱降遂登燕然山去塞五千餘里刻石勒功紀漢威德若夫燕然山者必在速邪烏之地而速邪烏必在漠北而非薊之燕山也

焉支山

霍去病元狩三年出隴西有功武帝曰驃騎涉狐奴轉戰六日至焉支山千有餘里合短兵鏖戰皋蘭下通典甘州刪丹縣有焉支山匈奴失之乃歌曰失我焉支山使我婦女無顏色說者曰焉支闕氏也今之燕脂也此山產紅藍可爲燕脂而闕氏資以爲飾故失之則婦女無顏色其說或然也

浚稽山

應邵曰浚稽山在武威塞北匈奴以爲蔽障路

金山

隋唐間突厥阿史那氏得古匈奴北部之地居金山之陽

賀蘭山

賀蘭山在靈州保靜縣山有林木青白望如駿馬北人呼駝馬爲賀蘭

宋程大昌著

北邊備對終

古今說海

桂海虞衡志序

始余自紫薇垣出帥廣右姻親故人張飲松江皆以炎荒風土爲戚余取唐人詩考桂林之地少陵謂之宜人樂天謂之無瘴退之至以湘南山勝於驂鸞仙去則宦遊之適甯有踰於此者乎旣以解親友而遂行乾道八年三月旣至郡則風氣清淑果如所聞而巖岫之奇絕習俗之醕古府治之雄勝又有過所聞者余旣不鄙夷其民而民亦矜予之拙而信其誠相戒毋欺侮歲比稔幕府少文書居二年余心安焉承詔徙鎮全蜀亟上疏固謝不能留再閱月辭勿獲命乃與桂民別民觴客於途旣出郭又留二日始得去航瀟湘絕洞庭泝灩澦馳驅兩川半年達於成都道中無事時念昔游因追記其登臨之處與風物土宜凡方志所未載者萃爲一書蠻陬絕徼見聞可紀者亦附著之以備土訓之圖噫錦城以名都樂國聞

天下余幸得至焉然且倦倦於桂林至爲之綴緝瑣碎如此蓋以信余之不鄙夷其民雖去之遠且在名都樂國而猶弗忘之也溥熙二年長至日吳郡范成大至能書


欽定四庫全書提要

桂海虞衡志一卷

宋范成大撰乾道二年成大由中書舍人出知靜江府淳熙二年除敷文閣待制四川制置使是編乃由廣右入蜀之時道中追憶而作自序謂凡所登臨之處與風物土宜方志所未載者萃爲一書蠻陬絕徼見聞可紀者亦附著之共十三篇曰志洞巖志金石志香志酒志器志禽志獸志蟲魚志花志果志草木雜志志蠻每篇各有小序皆志其土之所有惟志巖洞僅去城七八里內嘗所游者志金石準本草之例僅取方藥所須者志蠻僅錄聲問相接者故他不備載志香多及海南以世稱二廣出香而不知廣東香自舶上來廣右香產海北者皆凡品志器兼及外蠻兵甲之制以爲司邊鎮者所宜知故不嫌旁涉諸篇皆敘述簡雅無夸飾土風附會古事之習其論辰砂

宜砂地脈不殊均生白石牀上訂本草分別之譌邕州出砂融州實不出砂證圖經同音之誤零陵香產宜融諸州非永州之零陵唐書稱林邑出結遼鳥卽邕州之秦吉了佛書稱象有四牙六牙其說不實桂嶺在賀州不在廣州亦頗有考證成大石湖詩集凡經歷之地山川風土多記以詩其中第十四卷自註皆桂林作而詠花惟有紅豆蔻一首詠果惟有盧橘一首至詠游覽惟有棲霞洞一首佛子巖一首其見於詩註者亦僅蠻茶老酒蝓蛇皮腰鼓象皮兜鍪四事不及他處之詳疑以此志已具故不更記以詩也其盧橘一種志果不載觀其志花小序稱北州所有皆不錄或志果亦用此例蠻茶一種志草木中亦無之考詩註稱蠻茶出修仁大治頭風而註草木中有鳳膏藥亦云葉如冬青治太陽痛頭目昏眩或一物二名耶然檢文獻通考四裔考中引桂海虞衡志幾盈一卷皆志蠻之文而此本悉

不載其餘諸門檢永樂大典所引亦多在此本之外蓋原書本三卷
而此本併爲一卷已刊削其大半則諸物之或有或無亦非盡原書
之故矣



古今說海

桂海虞衡志目錄

志巖洞

志金石

志香

志酒

志器

志禽

志獸

志蟲魚

志花

志果

志草木

雜志

志蠻

目錄終

古今說海

桂海虞衡志

志巖洞

說選十四 偏記十一

余嘗評桂山之奇宜爲天下第一士大夫落南者少往往不知而聞者亦不能信余生東吳而北撫幽薊南宅交廣西使岷峨之下三方皆走萬里所至無不登覽太行常山衡嶽廬阜皆崇高雄厚雖有諸峯之名政爾魁然大山峯云者蓋強名之其最號奇秀莫如池之九華歛之黃山括之仙都溫之鴈蕩夔之巫峽此天下同稱之者然皆數峯而止爾又在荒絕僻遠之瀕非几杖間可得且所以能拔乎其萃者必因重岡複嶺之勢盤亘而起其發也有自來桂之千峯皆旁無延緣悉自平地崛起特立玉筍瑤簪森列無際其怪且多如此誠當爲天下第一韓退之詩云水作青羅帶山如碧玉簪柳子厚訾家洲記云桂洲多靈山發地峭竦竪林立四野黃魯直詩云桂嶺環城如鴈蕩平地蒼玉忽嵯峨觀三子語意則桂山之奇固在目中不待余言之贅頃嘗圖其真形寄吳中故人蓋無深信者此未易以口

舌爭也山皆中空故峯下多佳巖洞有名可紀者三十餘所皆去城不過七八里近者二三里一日可以徧至今推其尤者記其略

(讀書巖)在獨秀峯下直立郡治後爲桂主山傍無坡阜突起千丈峯趾石屋有便房石榻石牖如環堵之室顏延年守郡時讀書其中

(伏波巖)突然而起且千丈下有洞可容二十榻穿鑿通透戶牖傍出有懸石如柱去地一線不合俗名馬伏波試劍石前浸江濱波浪洶湧日夜漱齧之

(疊綵巖)在八桂堂後支徑登山大半有洞曲轉穿出山背

(白龍洞)在南溪平地半山中竈有大石屋由屋右壁入洞行半途有小石室

(劉仙巖)在白龍洞之陽仙人劉仲遠所居也石室高寒出半山間

(華景洞)高廣如十間屋洞門亦然

(水月洞)在宜山之麓其半枕江天然剝刻作大洞門透徹山背頂高數十丈其形正員望之端整如大月輪江別派流貫洞中踞石弄水如坐捲蓬大橋下

(龍隱洞龍隱巖)皆在七星山脚沒江水中泛舟至石壁下有洞門高可百丈鼓

擢而入仰觀洞頂有龍跡夭矯若印泥然其長竟洞舟行僅一箭許別有洞門可出巖在洞側山半有小寺卽巖爲佛堂不復屋

(雉巖)亦江濱獨山有小洞洞門下臨灘江

(立魚峯)在西山後雄偉高峻如植立一魚餘峯甚多皆蒼石刻峭

(棲霞洞)在七星山七星山者七峰位置如北斗又一小峰在傍曰輔星石洞在山半腹入石門下行百餘級得平地可坐數十人傍有兩路其一西行兩壁石液凝沍玉雪晶瑩頂高數十丈路闊亦三四丈如行通衢中頓足曳杖鏗然有聲如鼓鐘聲蓋洞之下又有洞焉半里遇大壑不可進一路北行俯僂而入數步則寬廣兩傍十許丈鍾乳垂下纍纍凡乳床必因石脉而出不自頑石出也進里餘所見益奇又行食頃則多岐遊者恐迷途不敢進云通九疑山也

(元風洞)去棲霞傍數百步風自洞中出寒如冰雪

元字胡涓切

(曾公洞)舊名冷水巖山根石門砢然入門石橋甚華曾丞相子宣所作有瀾水莫知所從來自洞中右旋東流橋下復自右入莫知所往或謂泐流入於江也度橋有

仙田數畝過田路窄且濕俯視石罅尺餘匍匐而進旋復高曠可通棲霞

(屏風巖)在平地斷山峭壁之下入洞門上下左右皆高廣百餘丈中有平地可宴百客仰視鍾乳森然倒垂者甚多礪石磴五十級有石穴通明透穴而出則山川城郭恍然無際余因其處作朝天觀而命其洞曰空明

(隱山六洞)皆在西湖中隱山之上一曰朝陽二曰夕陽三曰華華四曰北牖五曰嘉蓮六曰白萑泛湖泊舟自西北登山先至南華出洞而西至夕陽洞窮有石門可出至北牖出洞十許步至朝陽又西至北牖穴口隘狹側身入有穴通嘉蓮西湖之外既有四山巉巖碧玉千峰倒影水面固已奇絕而湖心又浸陰山諸洞之外別有奇峰繪畫所不及荷花時有泛舟故事勝賞甲於東南

(北潛洞)在隱山之北中有石室石臺石果之屬石果作荔枝胡桃棗栗之形人采取玩之或以釘盤相問遣

(南潛洞)在西湖中羅家山上

(佛子巖)亦名鍾隱巖去城十里號最遠一山萃起莽蒼中山腰有上中下三洞最

廣中洞明敞高百許丈上洞差窄一小寺就洞中結架因石屋爲堂室

(虎秀洞)去城差遠大石室面平野室左右皆有徑隧各數十百步穿透兩傍亦臨平野以上所紀皆附郭可日涉者餘外邑巖洞尙多不可皆到興安石乳洞最勝余罷郡時過之上中下亦三洞此洞與棲霞相甲乙他洞不及也陽朔亦有綉山羅漢白鶴華蓋明珠五洞皆奇又聞容州都嶠有三洞天融州有靈巖眞仙洞世傳不下桂林但皆在瘴地士大夫尤罕到

志金石

本草有玉石部專主藥物非療病雖重不錄此篇亦主爲方藥所須者

(生金)出西南州峒生山谷田野沙土中不由礦出也峒民以淘沙爲生坻土出之自然融結成顆大者如麥粒小者如麩片便可鍛作服用但色差淡耳欲令精好則重鍊取足色耗去什二三既鍊則是熟金丹竈所須生金故錄其所出

(丹砂)本草以辰砂爲上宜砂次之今宜山人云出砂處與湖北犬牙山北爲辰砂南爲宜砂地脉不殊無甚分別宜砂老者白色有墻壁如鏡生白石床上可入鍊勢

敵辰砂本草圖經乃云宜砂出土石間非白石床所生卽是未識宜砂也別有一種色紅質嫩者名土坑砂乃是出土石間者不甚耐火邕州亦有砂大者數十百兩作塊黑闇少墻壁嚼之紫黛不堪入藥彼人惟以燒取水銀圖經又云融州亦有砂今融州元無砂邕融聲相近蓋誤云

(水銀)以邕州溪洞朱砂末之入爐燒取極易成以百兩爲一銚銚之制以猪胞爲骨外糊厚紙數重貯之不漏

(鍾乳)桂林接宜融山中洞穴至多勝連州遠甚余遊洞親訪之仰視石脉湧起處卽有乳床如玉雪石液融結所爲也乳床下垂如倒數峰小山峰端漸銳且長如冰柱柱端輕薄中空如鵝管乳水滴瀝未已且滴且凝此乳之最精者以竹管仰盛折取之練治家又以鵝管之端尤輕明如雲母爪甲者爲勝

(銅)邕州右江州峒所出掘地數尺卽有礦故蠻人好用銅器

(綠)銅之苗也亦出右江有銅處生石中質如石者名石綠又有一種脆爛如碎土者名泥綠品最下價亦賤

(滑石)桂林屬邑及瑤洞中皆出有白黑二種功用相似初出如爛泥見風則堅又謂之冷石土人以石灰圻壁及未乾時以滑石末拂拭之光瑩如玉

(鉛粉)桂州所作最有名謂之桂粉其粉以黑鉛著糟糞罨化之

(無名異)小黑石子也桂林山中極多一每數百枚

(石梅)生海中一叢數枝橫斜瘦硬形色真枯梅也雖巧工造作所不能及根所附著如覆菌或云本質爲海水所化如石蟹石蝦之類

(石柏)生海中一幹極細上有一葉宛是側柏扶疏無小異根所附著如鳥藥大抵皆化爲石矣此與石梅雖未詳可以入藥否然皆奇物不可不志

志香

南方火行其氣炎上藥物所賦皆味辛而嗅香如沉箋之屬世專謂之香者又美之所鍾也世皆云二廣出香然廣東香乃自舶上來廣右香產海北者亦凡品惟海南最勝人士未嘗落南者未必盡知故著其說

(沉水香)上品出海南黎峒一名土沉香少大塊其次如蠶栗角如附子如芝菌如

茅竹葉者佳至輕薄如紙者入水亦沉香之節因久蟄土中滋液下流結而爲香採時香面悉在下其背帶木性者乃出土上環島四郡界皆有之悉冠諸番所出又以出萬安者爲最勝說者謂萬安山在島正東鍾朝陽之氣香尤醞藉豐美大抵海南香氣皆清淑如蓮花梅英鵝梨蜜脾之類焚一博投許氛翳彌室翻之四面悉香至煤燼氣不焦此海南香之辨也北人多不甚識蓋海上亦自難得省民以牛博之於黎一牛博香一擔歸自差擇得沉水十不一二中州人士但用廣州舶上占城真臘等香近年又貴丁流眉來者余試之乃不及海南中下品舶香往往腥烈不甚腥者意味又短帶木性尾煙必焦其出海北者生交趾及交人得之海外番舶而聚於欽州謂之欽香質重實多大塊氣尤酷烈不復風味惟可入藥南人賤之

(蓬萊香)亦出海南卽沉水香結未成者多成片如小笠及大菌之狀有徑一二尺者極堅實色狀皆似沉香惟入水則浮剝去其背帶木處亦多沉水

(鷓鴣斑香)亦得之於海南沉水蓬萊及絕好箋香中槎牙輕鬆色褐黑而有白斑點點如鷓鴣臆上毛氣尤清婉似蓮花

(箋香) 出海南香如蝟皮栗蓬及漁篋狀蓋修治時雕鏤費工去木留香棘刺森然香之精鍾於刺端芳氣與他處箋香夔別出海北者聚於欽州品極凡與廣東舶上生熟速結等香相埒海南箋香之下又有重漏生結等香皆下色

(光香) 與箋香同品第出海北及交趾亦聚於欽州多大塊如山石枯槎氣麤烈如焚松檜曾不能與海南箋香比兩人常以供日用及常程祭享

(沉香) 出交趾以諸香草合和蜜調如薰衣香其氣溫靡自有一種意味然微昏鈍
(香珠) 出交趾以泥香捏成小巴豆狀琉璃珠間之綵絲貫之作道人數珠入省地賣南中婦人好帶之

(思勞香) 出日南如乳香厯青黃褐色氣如楓香交趾人用以合和諸香
(排草) 出日南狀如白茅香芬烈如麝香亦用以合香諸草香無及之者
(檳榔苔) 出西南海島生檳榔木上如松身之艾蒨單熱極臭交趾人用以合泥香則能成溫靡之氣功用如甲香

(橄欖香) 橄欖木脂也狀如黑膠飴江東人取黃連木及楓木脂以爲欖香蓋其類

出於橄欖故獨有清烈出塵之意品格在黃連楓香之上桂林東江有此果居人采香賣之不能多得以純脂不雜木皮者爲佳

（零陵香）宜融等州多有之土人編以爲蓆薦坐褥性煖宜人零陵今永州實無此香

志酒

余性不能酒士友之飲少者莫余若而能知酒者亦莫余若也頃數仕於朝游王公貴人家未始得見名酒使虜至燕山得其宮中酒號金蘭者乃大佳燕西有金蘭山汲其泉以釀及來桂林而飲瑞露乃盡酒之妙聲震湖廣則雖金蘭之勝未必能頡頏也

（瑞露）帥司公廚酒也經撫所前有井清烈汲以釀遂有名今南庫中自出一泉近年只用庫井酒仍佳

（古辣泉）古辣本賓橫間墟名以墟中泉釀酒既熟不煮埋之地中日足取出

（老酒）以麥麴釀酒密封藏之可數年士人家尤貴重每歲臘中家家造鮮使可爲

卒歲計有貴客則設老酒冬鮓以示勤婚娶亦以老酒爲厚禮

志器

南州風俗獠雜蠻獠故凡什器多詭異而外蠻兵甲之製亦邊鎖之所宜知者

(竹弓)以熏竹爲之筋膠之制一如角弓惟揭箭不甚力

(黎弓)海南黎人所用長楮木弓也以藤爲弦箭長三尺無羽鏃長五寸如茨菰葉以無羽故射不遠三四丈然中者必死

(蠻弩)諸峒獠及西南諸蕃其造作略同以硬木爲弓樁甚短似中國獵人射生弩但差大耳

(獠人弩)又名編架弩無箭槽編架而射也

(藥箭)化外諸蠻所用弩雖小弱而以毒藥濡箭鋒中者立死藥以蛇毒草爲之

(蠻甲)惟大理國最工甲冑皆用象皮胸背各一大片如龜殼堅厚與鐵等又聯綴小皮片爲披膊護項之屬製如中國鐵甲葉皆朱之兜鍪及甲身內外悉朱地間黃黑漆作百花蟲獸之文如世所用犀毗器極工妙又以小白貝纍纍駱甲縫及裝兜

蓋疑猶傳古貝冑朱縵遺製云

(黎兜蓋)海南黎人所用以藤織爲之

(雲南刀)卽大理所作鐵青黑沉沉不銹南人最貴之以象皮爲鞘朱之上亦畫犀毗花文一鞘兩室各函一刀鞘以皮條纏束貴人以金銀絲

(峒刀)兩江州峒及諸外蠻無不帶刀者一鞘二刀與雲南同但以黑漆雜皮爲鞘(黎刀)海南黎人所作刀長不過一二尺鞘乃三四寸織細藤纏束之鞘端插白角片尺許如鴟鴞尾以爲飾

(蠻鞍)西南諸番所作不用韉但空垂兩木鐙鐙之狀刻如小龕藏足指其中恐入榛棘傷足也後鞦鍻木爲大錢纍纍貫數百狀如中國騾驢鞦

(蠻鞭)刻木節節如竹根朱墨間漆之長纜四五寸其首有鐵環貫二皮條以策馬(花腔腰鼓)出臨桂職田鄉其土特宜鼓腔村人專作窖燒之油畫紅花紋以爲飾(銅鼓)古蠻人所用南邊土中時有掘得者相傳爲馬伏波所遺其製如坐墩而空其下滿鼓皆細花紋極工緻四角有小蟾蜍兩人舁行以手拊之聲全似鞞鼓

(鉢鼓) 獠人作狀如腰鼓腔長倍之上銳下侈亦以皮鞞植於地坐拊之
(盧沙) 獠人樂狀類簫縱八管橫一管貫之

(胡盧笙) 兩江峒中樂

(藤合) 屈藤盤繞成柶合狀漆固護之出藤梧等郡

(雞毛筆) 嶺外亦有兔然極少俗不能爲兔毫筆率用雞毛其鋒跟躑不聽使

(練子) 出兩江州洞大略似苧布有花紋者謂之花練土人亦自貴重

(綵) 亦出兩江州洞如中國線羅上有徧地小方勝紋

(蠻氈) 出西南諸番以大理者爲最蠻人晝披夜臥無貴賤人有一番

(黎幕) 出海南黎峒人得中國錦綵拆取色絲間木綿挑織而成每以四幅聯成一幕

(黎單) 亦黎人所織青紅間道木綿布也桂林人悉買以爲臥具

(檳榔合) 南人既喜食檳榔其法用石灰或蜆灰并扶留藤同咀則不澁土人家至以銀錫作小合如銀錠樣中爲三室一貯灰一貯藤一貯檳榔

(鼻飲盃)南人習鼻飲有陶器如杯碗旁植一小管若瓶嘴以鼻就管吸酒漿暑月以飲水云水自鼻入咽快不可言邕州人已如此記之以發覽者一胡盧也

(牛角盃)海旁人截牛角令平以飲酒亦古兕觥遺意

(蠻碗)以木刻朱黑間漆之侈腹而有足如敦甗之形

(竹釜)獠人所用截大竹筒以當鑪鼎食物熟而竹不燔蓋物理自爾非異也

(戲面)桂林人以木刻人面窮極工巧一枚或值萬錢

志禽

南方多珍禽非君子所問又余以法禁采捕甚急故不能多識偶於人家見之及有異聞者錄以備博物

(孔雀)生高山喬木之上人探其雛育之喜臥沙中以沙自浴拘甚適雄者尾長數尺生三年尾始長歲一脫尾夏秋復生羽不可近目損人飼以猪腸及生菜惟不食菘

(鸚鵡)近海郡尤多民或以鸚鵡爲鮮又以孔雀爲腊皆以其易得故也此二事載

籍所未紀自余始志之南人養鸚鵡者云此物出炎方稍北中冷則發瘴噤戰如人患寒熱以柑子飼之則愈不然必死

（白鸚鵡）大如小鵝亦能言羽毛玉雪以手撫之有粉黏著指掌如蛺蝶翅

（烏鳳）如喜雀色紺碧頸毛類雄雞鬚頭有冠尾垂二弱骨各長一尺四五寸其杪始有毛羽一簇冠尾絕異大略如鳳鳴聲清越如笙簫然度曲妙合宮商又能爲百蟲之音生左右江溪洞中極難得然書傳未之紀當由人罕識云

（秦吉了）如鸚鵡紺黑色丹味黃距目下連項有深黃文頂毛有縫如人分髮能人言比鸚鵡尤慧大抵鸚鵡如兒女吉了聲則如丈夫出邕州溪洞中唐書林邑出結遼烏林邑今占城去邕欽州但隔交趾疑卽吉了也

（錦鷄）又名金鷄形如小雉湖南北亦有之

（山鳳凰）狀如鵝鴈嘴如鳳巢兩江深林中伏卵時雄者以木枝雜桃膠封其雌於巢獨留一窠雄飛求食以飼之子成卽發封不成則窠窠殺之此亦異物然未之見也

(翻毛雞) 翻翎皆翻生彎彎向外尤馴狎不散逸二廣皆有

(長鳴雞) 高大過常雞鳴聲甚長終日蹄號不絕生邕州溪洞中

(翡翠) 出海南邕賀二州亦有腊而賣之

(灰鶴) 大如鶴通身灰慘色去頂二寸許毛始丹及頸之半亦能鳴舞

(鷓鴣) 大如竹雞而差長頭如鶉身文亦然惟臆前白點正圓如珠人采食之

(水雀) 蒼色似鶺鴒飛集戶庭翩翩然與燕雀爲伍

志獸

獸莫巨於象莫有用於馬皆南土所宜余治馬政頗補苴漏隙其說累牘所不能載姑著其略及畜獸稍異者併爲一篇

(象) 出交趾山谷惟雄者則兩牙佛書云四牙又云六牙今無有

(蠻馬) 出西南諸番多自毗那自杞等國來自杞取馬於大理古南詔也地連西戎

馬生尤蕃

(大理馬) 爲西南番之最

(果下馬)土產小駟也以出德慶之瀧水者爲最高不踰三尺駿者有兩脊骨故又號雙脊馬健而喜行

(猿)有三種金絲者黃玉面者黑純黑者面亦黑金絲玉面皆難得或云純黑者雄金絲者雌又云雄能嘯雌不能也猿性不耐著地著地輒瀉以死煎附子汁飲之卽愈

(蠻犬)如獵狗警而獠

(鬱林犬)出鬱林州極高大垂耳拳尾與常犬異

(花羊)南中無白羊多黃褐白斑如黃牛又有一種深褐黑脊白斑全似鹿

(乳羊)本出英州其地出仙茅羊食茅舉體悉化爲肪不復有血肉食之宜人

(綿羊)出邕州溪洞及諸蠻國與朔方胡羊不異

(麝香)自邕州溪洞來者名土麝氣燥烈不及西番

(火狸)狸之類不一邕別有一種其毛色如金錢豹但其錢差大耳彼人云歲久則化爲豹其文先似之矣

(風狸)狀似黃猿食蜘蛛晝則拳曲如蝟遇風則飛行空中其溺及乳汁止大風疾奇効

(嫵婦)如山猪而小喜食禾田夫以機軸織絨之器掛田所則不復近安平七源等州有之

(山猪)卽豪猪身有棘刺能振發以射人三二百爲羣以害禾稼州洞中甚苦之

(石鼠)專食山豆根賓州人以其腹乾之治咽喉疾効如神謂之石鼠肚

(香鼠)至小僅如指擘大穴於柱中行地中疾如激箭

(山獺)出宜州溪洞俗傳爲補助要藥洞人云獺性淫毒山中有此物凡牝獸悉避去獺無偶抱木而枯洞獺尤貴重云能解藥箭毒中箭者研其骨少許傳治立消一枚直金一兩人或求買但得殺死者功力甚劣

志蟲魚

蟲魚微物外薄於海者其類庸可旣哉錄偶見聞者萬一

(珠)出合浦海中有珠池鮪戶投水採蚌取之歲有豐耗多得謂之珠熟相傳海底

有處所如城郭大蚌居其中有怪物守之不可近蚌之細碎蔓延於外者始得而采
(車磔)似大蚌海人磨治其殼爲諸玩物

(蚌蛇)大者如柱長稱之其膽入藥南人腊其皮刮去鱗以鞵鼓蛇常出逐鹿食塞
兵善捕之數輩滿頭插花趨赴蛇蛇喜花必駐視漸近競拊其首大呼紅娘子蛇頭
益俛不動壯士大刀斷其首衆悉奔散遠伺之有頃蛇省覺奮迅騰擲傍小木盡拔
力竭乃斃數十人畀之一村飽其肉

(螻蛄)形似龜龜輩背甲十三片黑白斑文相錯鱗差以成一背其邊裙闕闊嚙如
鋸齒無足而有四鬣前兩鬣長狀如櫂後兩鬣極短其上皆有鱗甲以四鬣櫂水而
行海人養以鹽水飼以小鱗俗傳甲子庚申日輒不食謂之螻蛄齋日其說甚俚

(蜈蚣)有極大者

(青螺)狀如田螺其大兩拳揩磨去麤皮如翡翠色雕琢爲酒盃

(鸚鵡螺)狀如蝸牛殼磨治出精采亦雕琢爲盃

(貝子)海傍皆有之大者如拳上有紫斑小者指面大白如玉

(石蟹)生海南形真是蟹云是海味所化理不可詰又有石蝦亦其類

(鬼蛺蝶)大如扇四翅好飛荔枝上

(黑蛺蝶)大如扇橘蠹所化北人云玄武蟬

(嘉魚)狀如小鱗魚多脂味極腴美出梧州火山人以為鮮餉遠

(蝦魚)出灘水肉白而豐味似蝦而鬆美

(竹魚)出灘水狀似青魚味如鰕魚南中魚品如鯉鯽輩皆有之而以蝦竹二魚為珍

(天蝦)狀如大飛蟻秋社後有風雨則羣墮水中有小翅人候其墮掠取之為鮮

志花

桂林具有諸草花木牡丹芍藥桃杏之屬但培溉不力存形似而已今著其土產獨宜者凡北州所有皆不錄

(上元紅)深紅色絕似紅木瓜花不結實以燈夕前後開故名

(白鶴花)如白鶴立春開

(南山茶)葩萼大倍中州者色微淡葉柔薄有毛別自有一種如中州所出者

(紅荳蔻花)叢生葉瘦如碧蘆春末發初開花先抽一榦有大籜包之籜解花見一穗數十蕊淡紅鮮妍如桃杏花色蕊重則下垂如葡萄又如火齊纓絡及剪綵鸞枝之狀此花無實不與草荳蔻同種每蕊心有兩瓣相並詞人託興曰比目連理云

(泡花)南人或名柚花春末開蕊圓白如大珠既拆則似茶花氣極清芳與茉莉素馨相逼番人采以蒸香風味超勝

(紅蕉花)葉瘦類蘆箬心中抽條條端發花葉數層日拆一兩葉色正紅如榴花荔子其端各有一點鮮綠尤可愛春夏開至歲寒猶芳又有一種根出土處特肥飽如膽餅名膽餅蕉

(枸那花)葉瘦長略似楊柳夏開淡紅花一朶數十萼至秋深猶有之

(史君子花)蔓生作架植之夏開一簇一二十葩輕盈似海棠

(水西花)葉如萱草花黃夏開

(裏梅花)卽木槿有紅白二種葉似蜀葵采紅者連葉包裹黃梅鹽漬暴乾以薦酒

故名玉修花粉紅色四季開

(象蹄花)如梔子而葉小夏開至秋深

(素馨花)比番禺所出爲少當由風土差宜故也

(茉莉花)亦少如番禺以浙米漿日澆之則作花不絕可耐一夏花亦大且多葉倍常花六月六日又以治魚腥水一澆益佳

(石榴花)南中一種四季常開夏中旣實之後秋深忽又大發花且實枝頭碩果罅裂而其旁紅莢粲然併花實折釘盤筵極可玩

(添色芙蓉花)晨開正白午後微紅夜深紅

(側金盞花)如小黃葵葉似槿歲暮開與梅同時

志果

世傳南果以子名者百二十半是山野間草木實猿狙之所甘人強名以爲果故余不能盡識錄其識可食者五十五種

(荔枝)自湖南界入桂林纔百餘里便有之亦未甚多昭平出標核臨賀出綠色者

尤勝自此而南諸郡皆有之悉不宜乾肉薄味淺不及閩中所產

〔龍眼〕南州悉有之極大者出邕州圍如當二錢但肉薄不能遠過常品爲可恨

〔饅頭柑〕近蕃起饅頭尖者味香勝可埒永嘉乳柑

〔金橘〕出營道者爲天下冠出江浙者皮甘肉酸不逮矣

〔綿李〕味甘美勝常品擘之兩片開如離核桃

〔石栗〕圓如彈子每顆有梗抱附之類杓柄肉黃白甘朝似巴欖子仁附肉有白鬚不可食發病北人或呼爲海胡桃

〔龍荔〕殼如小荔枝肉味如龍眼木身葉亦似二果故名可蒸食不可生啖令人發痢或見鬼物三月開小白花與荔枝同時

〔木竹子〕皮色形狀全似枇杷肉甘美秋冬間實

〔冬桃〕狀如棗深碧而光輾爛甘酸春夏熟

〔羅望子〕殼長數寸如肥皂又如刀豆色正丹內有二三實煨食甘美

〔人面子〕如大梅李核如人面兩目鼻口皆具肉甘酸宜蜜煎

(烏欖)如橄欖青黑色肉爛而甘

(方欖)亦橄欖類三角或四角出兩江州洞

(椰子)木身葉悉類欖櫚檳榔之屬子生葉間一穗數枚枚大如五升器果之大者謂惟此與波羅蜜等耳皮中子殼可爲器子中瓤白如玉味美如牛乳瓢中酒新者極清芳久則渾濁不堪飲

(蕉子)芭蕉極大者凌冬不凋中抽幹長數尺節節有花花蘗葉根有實去皮取肉軟爛如綠柿極甘冷四季實土人或以飼小兒云性涼去客熱以梅汁漬暴乾按令扁味甘酸有微霜世所謂芭蕉乾者是也又名牛子蕉

(雞蕉子)小如牛蕉亦四季實

(芽蕉子)小如雞蕉尤香嫩甘美秋初實

(紅鹽草果)取生草荳蔻入梅汁鹽漬令色紅暴乾以薦酒

(鸚鵡舌)卽紅鹽草果之珍者實始結卽頻取紅鹽乾之纔如小舌

(八角茴香)北人得之以薦酒少許咀嚼甚芳香出左右江州洞中

(餘甘子)多販入北州人皆識之其木可以制器

(五梭子)形甚詭異瓣五出如田家碌礮狀味酸久嚼微甘閩中謂之羊桃

(黎朦子)如大梅復如小橘味極酸

(波羅蜜)大如冬瓜外膚礪礪如佛髻削其皮食之味極甘子練悉如冬瓜生大木上秋熟

(柚子)南州名臭柚大如瓜人亦食之皮甚厚打碑者卷皮蘸墨以代氈刷宜墨而不損紙極便於用此法可傳但北州無許大柚耳

(櫓罌子)大如半升碗諦視之數十房攢聚成毬每房有縫冬生青至夏紅破其瓣食之微甘

(槎擦子)如錐栗肉甘而微澁

(地蠶)生土中如小蠶又如甘露子

(赤柚子)如橄欖皮青肉赤以下並春實

(火炭子)加鳥李

(山韶子)色紅肉如荔枝以下八種並夏實

(山龍眼)色青肉如龍眼

(部諦子)色黃如大石榴

(木賴子)如淡黃大李

(粘子)如指面大褐色

(羅晃子)如橄欖其皮七重

(千歲子)如青黃李味甘

(赤棗子)如酸棗味酸

(藤韶子)大如鳧卵柿以下十三種並秋實

(古米子)殼黃中有肉如米粒

(殼子)如青梅味甘

(藤核子)生白藤上如小蒲桃

(木連子)如胡桃紫色

(蘿蒙子)黃如大橙柚

(毛栗)如橡栗

(特乃子)狀似榧而圓長端正

(不納子)似黃熟小梅絕易爛爛即破肉附核可爲經珠似菩提子

(羊矢子)色狀全似羊矢味亦不佳

(日頭子)狀如櫻桃色如蒲桃穗

(秋風子)色狀俱似棟子

(黃皮子)如小棗

(朱圓子)正圓深紅狀如棟子以下六種皆冬實

(匾桃)大如桃而匾色正青

(粉骨子)皮黃色如粉

(塔骨子)匾如大橘皮裏空虛

(布衲子)似李而黃

(黃肚子)如小石榴

志草木

異草瑰木多生窮山荒野其不中醫和匠石者人亦不采故余所識者少惟竹品乃多桀異併附於錄

(桂)南方奇木上藥也桂林以桂名地實不產而出於賓宜州凡木葉心皆一縱理獨桂有兩紋形如圭製字者意或出此葉味辛甘與皮無別而加苦美人喜咀嚼之(榕)易生之木又易高大可覆數畝者甚多根出半身附榦而下以入土故有榕木倒生根之語禽鳥銜其子寄生他木上便蔚茂根下至地得土氣久則過其所寄

(沙木)與杉同類尤高大葉尖成叢穗少與杉異

(桄榔木)身直如杉又如樓欄有節似大竹一榦挺上高數丈開花數十穗綠色

(思儒木)生兩江州洞堅實漬鹽水中百年不腐

(麝脂木)堅緻色如麝脂可斲作出融州及州洞桂林屬縣亦有之

(雞桐)葉如棟其葉煮湯療足膝疾

(龍骨木)色翠青狀如枯骨

(風膏藥)葉如冬青治太陽疼頭目昏眩

(南漆)如稀飴氣如松脂露霑無力

(蕩竹)葉大且密略如蘆葦

(澁竹)膚麤澁如木工所用砂紙可以錯磨爪甲

(人面竹)節密而凸宛如人面人采爲拄杖

(釣絲竹)類蕩竹枝極柔弱

(斑竹)中有疊暈江浙間斑竹直一淚痕無暈也

(貓頭竹)質性類筍竹

(桃枝竹)多生石上葉如小櫻櫚人以大者爲杖

(笏竹)刺竹也芒棘森然

(箭竹)山中悉有

(宿根茄)茄本不凋明年結實

(銅鼓草)其實如瓜療瘡瘍毒

(大蒿)容梧道中久無霜雪處年深滋長大者可作屋柱小亦中肩輿之扛

(石髮)出海上纖長如絲縷

(匾菜)細如荇帶匾如薤菜長一二尺

(都管草)一莖六葉辟蜈蚣蛇

(花藤)鏹以爲器用中有花紋

(胡蔓藤)毒草也揉其草漬之水入口卽死

雜志

嶠南風土之異宜錄以備博聞而不可以部居謂之雜志

(雪)南州多無雪霜草木皆不改柯易葉獨桂林歲歲得雪或臘中三白然終不及北州之多靈川興安之間兩山蹲踞中容一馬謂之嚴關朔雪至關輒止大盛則度送至桂林城下不復南矣

(風)廣東南海有颶風西路稍北州縣悉無之獨桂林多風秋冬大甚拔木飛瓦晝

夜不息俗傳朝作一日止暮七日夜半則彌旬去海猶千餘里非颺也土人自不知其說余試論之桂林地勢視長沙番禺在千丈之上高而多風理固然也

(癘水) 桂林有古記父老傳誦之略曰癘水繞東城永不見刀兵癘水瀰江也

(瘴) 二廣惟桂林無之自是而南皆瘴鄉矣瘴者山嵐水毒與草莽沴氣鬱勃蒸熏之所爲也其中人如瘡狀治法雖多常以附子爲急須不換金正氣散爲通用邕州兩江水土尤惡一歲無時無瘴春日青草瘴夏日黃梅瘴六七月日新禾瘴八九月日黃茅瘴土人以黃茅瘴爲尤毒桂嶺舊不知的實所在城北五里有尋丈小坡立石其上刻曰桂嶺賀州自有桂嶺縣相傳始名嶺在其地今小坡非也

(俗字) 邊遠俗陋牒訴券約專用土俗書桂林諸邑皆然今姑記臨桂數字雖甚鄙野而偏傍亦有依附養矮音不長也閩穩音坐於門中穩也奎亦音大坐亦穩也小嬾音小

兒也柔音人瘦弱也至終音人亡絕也秀音不能舉足也大音大女大及姊也音山石

之巖窟也音門橫關也他不能悉紀余閱訟牒二年習見之大理國間有文書至南邊及商人持其國佛經題識猶有用囹字者囹武后所作國字也唐書稱大禮國

今其國止用理字

(捲伴)南州法度疎略婚姻多不正村落強暴竊人妻女以逃轉移他所安居自若謂之捲伴言捲以爲伴侶也已而復爲後人捲去至有歷數捲未已者其舅姑若前夫訪知所在詣官自陳官爲追究往往所謂前夫亦是捲拌得之復爲後人所捲惟其親父母兄弟及初娶者所訴卽歸始初被捲之家

(草子)卽寒熱時疫南中吏卒小民不問病源但頭痛體不佳便謂之草子不服藥使人以小錐刺唇及舌尖出血謂之挑草子實無加損於病必服藥乃愈

志蠻

廣西經略使所領二十五郡其外則西南諸蠻蠻之區落不可殫記姑記其聲聞相接帥司常有事於其地者數種曰羈縻州洞曰獠曰蠻曰黎曰蠻通謂之蠻(羈縻州洞)隸邕州左右江者爲多舊有四道儂氏謂安平武勒忠浪七源四州皆儂姓又有四道黃氏謂安德歸樂露城田州皆黃姓又有武侯延衆石門感德四鎮之民自唐以來內附分析其種落大者爲州小者爲縣又小者爲洞國朝開拓寔廣

州縣洞五十餘所推其雄長者爲首領藉其民爲壯丁其人物獷悍風俗荒怪不可盡以中國教法繩治姑羈縻之而已有知州權州監州知縣知洞其次有同發遣權發遣之屬謂之主戶餘民皆稱提陀猶言百姓也其田計口給民不得典賣惟自開荒者由已謂之祖業口分田知州別得養印田猶圭田也權州以下無印記者得蔭免田既各服屬其民又以攻剽山獠及博買嫁娶所得生口男女相配給田使耕教以武技世世隸屬謂之家奴亦曰家丁民戶強壯可教勸者謂之田子田丁亦曰馬前牌總謂之洞丁今黃姓尙多而儂姓絕少智高亂後儂氏善良許從國姓今多姓趙氏有舉洞純一姓者婚媾不以爲嫌酋豪或娶數妻皆曰媚娘宜州管下亦有羈縻州縣十餘所其法制尤疏幾似化外其尤者曰南丹州待之又與他州洞不同特命其首領莫氏曰制史月支鹽料及守臣供給錢其說以謂宜州徼外卽唐黃家賊之地崇建南丹使控制之莫氏家人亦有時相攻奪今刺史莫延蕞逐其弟延廩而自立延廩奔朝廷謂之出宋

凡州洞歸明者皆稱出宋

(獠)本五溪槃瓠之後其壤接廣右者靜江之興安義甯古縣融州之融水懷遠縣

界皆有之生深山重溪中椎髻跣足不供征役各以其遠近爲伍

(獠)在右江溪洞之外俗謂之山獠依山林而居無酋長版籍蠻之荒忽無常者也以射生食動而活蟲豸能蠕動者皆取食無年甲姓名一村中惟有事力者曰郎火餘但稱火舊傳其類有飛頭鑿齒鼻飲白衫花面赤禪之屬二十一種今在江西南一帶甚多殆百餘種也

(蠻)南方曰蠻今郡縣之外羈縻州洞雖故皆蠻地猶近省民供稅役故不以蠻命之遇羈縻則謂之化外眞蠻矣區落連亘接於西戎種類殊詭不可勝記今志其近桂林者宜州有西南番大小張大小王龍石滕謝諸番地與牂牁接人椎髻跣足或著木履衣青花斑布以射獵讎殺爲事又南連邕州南江之外者羅殿自杞等以國名羅孔特磨白衣九道等以道名而峨州以西別有酋長無所統屬者蘇綺羅坐夜面計利流求萬壽多嶺阿悞等蠻謂之生蠻酋自謂太保大抵與山獠相似但有首領耳羅殿等處乃成聚落亦有文書公文稱守羅殿國王其外又有大蠻落西曰大理東曰交趾大理南詔國也交趾古交州治龍編又爲安南都護府

黎海南四郡隴上蠻也隴直雷州由徐開渡半日至隴之中有黎母山諸蠻環居四旁號黎人山極高常在霧靄中黎人自鮮識之久晴海氛清廓時或見翠尖浮半空云蠻皆椎髻跣足挿銀銅錫釵婦人加銅環耳墜垂肩女及笄卽黥頰爲細花紋謂之繡面女旣黥集親審相慶賀惟婢獲則不繡面四郡之人多黎姓蓋其裔族而今黎人乃多姓王

(蠻)海上水居蠻也以舟楫爲家採海物爲生且生食之入水能視合浦珠池蚌蛤惟蠻能沒水採取旁人以繩繫其腰繩動蓋則引而上先煮毳袖極熱出水急覆之不然寒慄而死或遇大魚蛟鼉諸海怪爲鬻蠶所觸往往潰腹折支人見血一縷浮水面知蠻死矣

桂海虞衡志終



宣統元年七月出版

不許複製

藏版者

集成圖書公司

印刷所

上海南京路
集成圖書公司

總發行所

上海棋盤街
集成圖書公司

分發行所

北京 天津 漢口 廣東 山西
集成圖書公司

經售處

各埠大書坊

古今說海全部計十二冊

定價大洋四元正

全
部
入
庫

上海图书馆藏书



A541 212 0017 0120B

Handwritten mark

上海圖書館

800

80074